

Kebanggaan Kerajaan Perikatan Malaysia Dengan Adanya Masjid Negara

Tiap-tiap seorang yang pergi ke ibu kota Malaysia, apabila turun di stesen kereta api Kuala Lumpur akan terpandang suatu bangunan yang indah dan besar yang mempunyai sebuah menara *modern* yang berbentuk roket. Apabila seseorang itu memandang ke atas menara itu dan meneliti baharulah mereka merasai atau berkesan kepada diri mereka bahawa bangunan itu bukanlah bangunan penyelidikan untuk roket tetapi ialah sebuah masjid kerana di atas menara itu sahaja ada terletak bulan bintang yang kecil yang hampir-hampir tersebunyi menunjukkan tanda-tanda ia sebuah masjid.

Masjid ini mempunyai sebuah menara yang tingginya 235 kaki terletak di tengah-tengah kolam yang berhias dengan beberapa pancutan air dan untuk bilal naik ke atas disediakan sebuah lif.

Di tengah-tengah bangunan itu di atasnya ditutupi oleh tutupan yang berupa payung yang berkembang dan di atas menaranya pula kalau dipandang dengan berhati-hati baharulah lahir yang ia bukannya bentuk roket tetapi bentuk payung yang kuncup.

Inilah suatu simbol yang melahirkan bahawa payung itu adalah menjadi kebesaran yang biasa digunakan oleh hampir-hampir semua sekali Raja-raja Melayu.

Masjid ini mengandungi suatu kawasan seluas 13 ekar dan masjid itu sahaja mengambil kawasannya seluas lima ekar. Di sana ada beberapa dewan dan tempat-tempat tinggal imam disediakan dan juga ada tempat-tempat untuk rehat sementara.

Belanja kerana membina masjid ini tadinya dianggarkan sebanyak lima juta ringgit tetapi akhirnya masjid ini telah memakan belanja sebanyak sepuluh juta ringgit terdiri daripada bantuan kerajaan persekutuan empat setengah juta, kerajaan-kerajaan negeri dua setengah juta dan derma dari orang ramai sebanyak tiga juta ringgit. Derma orang

ramai termasuklah derma-derma daripada bangsa-bangsa lain yang bukan Islam dan juga daripada pungutan-pungutan dengan cara-cara yang biasa dengan mengadakan permainan dan seumpamanya.

Untuk membuka Masjid Negara yang indah dan megah ini maka Jawatankuasa Sambutan telah menjemput kerajaan-kerajaan Islam untuk menghadiri istiadat pembukaan itu sebagai menunjukkan kepada dunia-dunia Islam bahawa kerajaan Malaysia adalah tegak dan terdiri menjunjung kedaulatan Islam. Masjid itu dipandang sebagai lambang keutamaan Islam dan lambang perpaduan umat Islam di Malaysia seperti yang dikatakan oleh Tengku Abdul Rahman dengan katanya:

“Bagi saya Masjid Negara ini menjadi lambang perpaduan seluruh rakyat Malaysia kerana masjid ini dibangunkan bukanlah semata-mata dari wang derma orang-orang Islam sahaja, tetapi juga derma dari orang-orang yang bukan Islam yang mempunyai semangat kerjasama dan taat setia yang tidak berbelah bahagi kepada negara ini. Inilah salah satu keistimewaan yang ada dalam negara kita ini.”

Sebelum itu tatkala beliau di Singapura dalam menyelesaikan rusuhan yang terjadi dalam masa Mawlid Nabī, beliau telah menyebut juga “semangat perpaduan” dengan menyatakan bahawa Masjid Negara dibina 80 peratus wangnya